

海城陳氏三代懿行錄

王士珍書



圖

畫

例言

(一) 此次徵文傑作甚多若細分之轉嫌雜糅茲特分爲十類一圖畫二公牘三事略傳碑銘墓誌四文類駢散文皆屬之五詩類近古體皆屬之六雜著詞頌贊銘等皆屬之七聯語八堂額九幃文十徵文啟告祭文

(二) 詩詞贊頌等所有上款大意相同故各種文字除首篇上款外餘均減去不用以免重複下款除官銜外所有稱呼亦皆減去以歸畫一閱者諒之

(三) 各種文字分類編次以文到先後爲前後之次序

(四) 海內騷客名家未及徵文者不少如不吝珠玉隨時惠賜以資光寵感且不朽
(五) 承賜各作輾轉鈔錄以迄檢印難免不有魯魚亥豕之訛博雅君子如隨時糾正尤屬幸甚

海城陳氏三代懿行錄 目錄

一圖畫

二公牘

三事略 傳 碑銘 墓誌

四文類

五詩類

六雜箸 詞頌贊銘

七聯語

八堂額

九幃文

十徵文啟 告祭文 附函

公

續

公牘

呈爲三代褒揚彙請備案并請令行原籍縣署備案事竊查先曾祖鐸以孝子稱先祖母張以節孝著曾經同鄉京官袁金鑑等及亞自身於民國四年稟請

內務部轉請褒揚蒙

大總統題給庸行克敦冰霜礪節匾額已登載於是年九月二十二日政府公報先考日新天性孝友先妣賈氏平生賢孝亦於民國十四年二月經同鄉京官梁玉書等呈請內務部轉請褒揚蒙

執政題給鄉國垂型慈孝揚庥匾額並給褒詞是年七月三十日政府公報已經登載伏思三代褒揚既邀國典一門節孝宜播鄉邦是以抄呈請褒原文仰懇

鈞署鑒核備案並請令行原籍海城縣公署備案以光梓里而振末流實爲德便謹呈

省長

海城縣公民陳

興亞
國治

民國十四年九月十九日

奉天省長公署批第八一九號

原具呈人陳興亞等

呈爲三代褒揚彙請備案並請令縣備案由

呈暨抄件均悉據稱前在內務部呈准褒揚請備案等情准予備案並令海城縣知照抄件存此批

謹將先曾祖父三代請褒揚原文抄列於左

袁金鎧等爲先曾祖鐸請褒揚稟

稟爲懇請褒揚孝行事竊維人生以盡孝爲先王化以教孝爲亟明倫所以善俗彰善正以導民茲查有已故孝子陳鐸係奉天海城縣人早歲業儒後習商務生平正直樂善天性肫誠年少失怙事母以孝聞以其家道甚貧爲人所難故宗族鄉黨翁

然交稱遠近均無間言道咸之間邑北民氣強頑禮教不行因感孝子之德一時里俗爲化現雖逝世而其流風餘韻鄉間父老至今稱道弗衰金鎧等誼屬同鄉夙所欽仰似此庸德之行實堪風世允宜追予褒揚之典藉挽澆薄之風謹依褒揚條例臚列孝行事狀並取具同鄉京官證明書稟懇大部呈請褒揚以彰潛德而勵末俗實爲公便謹稟

內務總長

附呈孝子事狀一冊證明書一紙

約法會議議員 袁金鎧

陸軍部科長勳五位韓麟春

陸軍砲十團團長少將王 坦

具稟人 參謀本部製圖局局長陳嘉樂

陸軍部科長高崇

財政部主事安海瀾

陸軍部法官楊書升

謹將已故孝子陳鐸生平孝行事狀列舉于左

計開

一孝子姓陳氏名鐸字振聲奉天海城縣人居邑北騰鰲堡父大本母王氏孝子生平正直樂善純孝性成幼讀書業儒後以家道中落改營商業父歿喪葬盡禮盡哀事母益敬謹務得歡心

一孝子事母不以家貧而簡略凡母衣食必設法購置一日家人欲爲孝子滷寢具索之數日未與再催之則曰已典當爲母購食品矣索衣亦然時值嚴冬之際人問之曰不懼寒乎則答以但願母體康強母心安樂爲子者雖寒何傷於是純孝之名噪於鄉里

一孝子凡事惟母命是聽時有慕孝子之爲人欲聘爲糧當商棧總經理者歲可得

數百金商之母母以遠遊不許卒不就其甯貧母違有如此者

一孝子精卜易凡鄉鄰之間卜者踵相接常有人令收卜費聊濟困貧孝子商之母母曰爾之卜未必悉驗安可收費乃止卽有人因求卜而有所贈送亦必俟有母命而後敢收受

一孝子平素宿母床側時居多依依有孺子之慕卽有時不宿母側亦必俟母睡後始返己室

一孝子孝行老而彌篤凡其母之起居飲食衣服沐浴必親自檢點便溺雖污毫無避忌柔聲下氣絕無倦容時孝子年近六旬在母前儼如童子人有稱之謂陳老萊子者其爲母濯手足剪指甲摩背梳髮等事至今鄉間老夫婦猶傳爲美談

一孝子僅一子名連茹年未三十而夭子婦寡而幼孫孤境遇甚厄時母年已八十矣痛孫之亡悲不能仰孝子恐有害老母健康每自忍慟破涕爲笑指孫以安慰之

一孝子當母病垂危之日親視湯藥衣不解帶者數旬母喪之日痛不欲生衣衾棺槨雖貧不薄時以墓地距家甚遠欲行廬墓之禮而寡婦孤孫又照料無人不得已將母柩厝於家園中孝子即在柩側營草屋居之僅避風雨如是者三年而陳孝子廬墓之名至今尙有稱道之者

一孝子於光緒乙亥卒於家時年七十二歲平生愛讀孝經及格言因果等書至於境遇則毫不動心生死每不介意廉潔自持言行不苟瞻宗族睦鄉里拯人急難諸盛德均堪與孝行并稱

證明書

爲證明事今因同鄉袁金鎧等稟陳已故孝子陳鐸生平孝行事狀均係實在委無虛飾合亟證明

具證明書人蒙藏院僉事李芳春內務部僉事楊乃賡

亞爲先祖母張請褒揚稟

稟爲籲懇褒揚節孝以勵庸行事竊維德昭貞順遂旌行義之門金賜淮揚爰著孝婦之號凡所以表懿行而敦風化也與亞伏念先祖母張氏秉性淑慎式則式儀年十七于歸先祖父連茹公敬順純謹闡職克修行年三十遽喪所天乃截髮以明心誓柏舟而守義苦時冰雪節操彌堅維時先曾祖衰老在堂父與叔旣孤且幼先祖母於堂上高年則能養致其歡病致其憂歿致其哀孝思拳拳始終不置以至教育子女迄於成立茹苦含辛數十年如一日迄今鄉閭族黨猶傳其節孝之難能可貴而稱道弗衰與亞仰沐先德受賜良多緬想遺徽湮沒是懼茲以供職京師謹依褒揚條例具呈事狀并取具同鄉京官證明書稟懇大部鑒核准予彙請褒揚以彰苦節而勵孝行實爲公便謹稟

內務總長

附呈節孝事狀一冊證明書一紙

具稟人京師憲兵營營長陳興亞奉天海城縣人現住炒豆胡同

謹將先祖母陳張氏生平節孝事狀列舉於左

計開

一先祖母張氏年十七歸先祖父連茹公行年三十遭先祖父喪矢志守節以終其身

一先祖母事奉翁姑恪盡孝道迨守節後孝思彌篤先後遭先曾祖父母喪親營喪葬尤能盡禮盡哀人稱賢孝

一先祖母守節之始興亞父僅八歲叔姑尤年幼先祖母爲之擇師課讀教以義方而卒底于成人

一先祖母治家尙勤儉凡井臼皆親操且以紡織營生以濟貧困仰事俯畜神疲力瘁至老不解

一先祖母性仁慈好善處諸姑姊妹伯叔兄弟和睦無間凡鄉鄰有疾苦無不存問

周恤

一先祖母生平舉止嚴肅言笑不苟凡親戚故舊非有事故不輕與往來

一先祖母卒於光緒十九年時年七十四歲計守節四十四年

證明書

爲證明事今因同鄉陳興亞之祖母張氏生平節孝狀均係實在委無虛冒合亟證明此證

具證明書人內務部僉事楊乃賡蒙藏院僉事李芳春

內務部彙請褒揚呈

部呈係彙案請褒人多文繁已見政府公報故將其文從略茲僅將關於先曾祖鐸先祖母張請褒部分抄呈於下

一已故孝子陳鐸奉天海城縣人幼喪父事母以孝聞母歿廬墓三年哀毀致疾以上已故孝子一名核與褒揚條例第一條第一款相符應給與庸行克敦匾額

一已故節婦陳張氏奉天海城縣人陳連茹之妻三十歲夫故七十四歲卒計守節

四十四年以上已故節婦一名核與褒揚條例第一條第二款相符應請給與冰霜礪潔匾額已於民國四年九月十七日奉批照准給予匾額在案

梁玉書等爲先考日新先妣賈氏請褒揚呈

呈爲遵例懇請特褒以勵風化事竊查有奉天海城縣故紳陳日新暨伊妻故婦陳賈氏生平行誼實與褒揚條例第一條第一第五第六等款規定相符玉書等或誼屬知交或世同里閭見聞較爲詳確謹遵例取具在京同鄉薦任文官二人證明書並造具事實清冊各一件理合具呈伏乞鑒核准入特例褒揚實爲德便謹呈

內務總長

附呈事實冊二件證明書一件褒揚費六十四元

財政部司長陳國權

具呈人內務部僉事梁玉書

蒙藏院僉事李芳春

京兆縣知事周志中

今將請求褒揚開列事實呈請鑒核

計開

陳公諱日新字德三奉天海城縣騰熬堡人生於清道光二十六年孝子振聲公之長孫連茹公之長子也弟一名作新八歲失怙家道中落振聲公經商亦所入甚微幸賴母張太君紡績製鬚以養年十一入塾讀書十六歲娶妻賈孺人公以既立家室又念母勞即思自立乃輟學經商冀稍獲蠅頭以減母勞年二十九遭振聲公喪先是振聲公早經鄉人請旌孝子公以承重孫當大事盡哀盡禮鄉黨皆稱之謂其後宜有賢孫也後轉新台子謙德當商而家事皆賴賈孺人經理頗資內助時家計稍裕母攜弟遷居四方台經營隴畝公每乘商事之暇時往定省每往必奉錢數千以資零用對于張太君之奉養未嘗稍有缺乏雖久在外經商而每月用費必按時寄家以供甘旨張太君治家教子嚴厲非常公時被督責人皆以爲難受而公則曰